



Saksdokument:

KM 25.0/21. Forholdet mellom Kyrkjerådets arbeidsgjevarutval og Kyrkjerådet
KM 25.1/21. Forslag til mandat for arbeidsgjevarutvalet som Kyrkjerådet fastsett
KM 25.2/21. Mandat arbeidsgjevarutvalet komitémerknader og vedtak frå Kyrkjemøtet 2017
KM 25.3/21 Første innstilling frå komité E

Forholdet mellom Kyrkjerådets arbeidsgjevarutval og Kyrkjerådet

Endeleg innstilling frå komité E

Samandrag av saksorienteringa

Kyrkjerådet bad i sak KR 62/21 om at forholdet mellom Kyrkjerådet sitt arbeidsgjevarutval (AGU) og Kyrkjerådet vart greia ut til Kyrkjerådsmøtet i september 2021, med moglegheit for å fremje sak til Kyrkjemøtet i november 2021 med forslag til endringar i mandatet for arbeidsgjevarutvalet.

Denne saka presenterer etableringa av Kyrkjerådets arbeidsgjevarutval og bakgrunnen for det – og det mandatet som vart vedteke av Kyrkjemøtet i 2017. Vidare inneheld saka nokre vurderingar av moglege endringar i mandatet for arbeidsgjevarutvalet.

For å tydeleggjera Kyrkjerådet sitt ansvar samanlikna med arbeidsgjevarutvalet sitt ansvar, meiner Kyrkjerådet at det bør vere Kyrkjerådet, og ikkje Kyrkjemøtet, som fastset mandat for arbeidsgjevarutvalet. Det vil gje Kyrkjerådet større fleksibilitet til å endre mandatet og til å gje særskilte fullmakter til arbeidsgjevarutvalet, om det skulle vere behov for det. Kyrkjerådet gjer framlegg om dette til Kyrkjemøtet.

Komiteens merknadar

Komiteen legg saksorienteringa til grunn med følgjande merknadar:

1. Det overordna arbeidsgjevaransvaret i rettssubjektet Den norske kyrkja ligg til Kyrkjemøtet. Kyrkjerådet utøver det sentrale arbeidsgjevaransvaret på vegne av Kyrkjemøtet, og dermed også rettssubjektet Den norske kyrkja. Det er tenleg at Kyrkjerådet kan leggje fleire av sine arbeidsgjevaroppgåver til eit arbeidsgjevarutval. Komiteen ser det også som tenleg at Kyrkjerådet framleis skal velje medlemmane til arbeidsgjevarutvalet sitt. Komiteen meiner at det bør vere Kyrkjerådet, og ikkje Kyrkjemøtet, som fastset mandat for arbeidsgjevarutvalet.
2. Vi viser til Reglar for val av Kyrkjerådet § 4-2 som seier at «Hvis Kirkemøtet vedtar mistillit til Kirkerådets leder eller til alle medlemmene av Kirkerådet som er valgt av Kirkemøtet, plikter vedkommende å tre ut av rådet fra det tidspunkt ny leder av Kirkerådet eller nytt Kirkeråd er valgt». Denne regelen viser at Kyrkjemøtet kan stille Kyrkjerådet til ansvar for sine avgjerder. Tilsvarande ordning kan ikkje gjerast gjeldande i tilhøvet mellom Kyrkjemøtet og arbeidsgjevarutvalet. Dersom arbeidsgjevarutvalet vert oppnemnt av Kyrkjerådet, og får sitt mandat derifrå, står arbeidsgjevarutvalet ansvarleg

overfor Kyrkjerådet. Kyrkjerådet vil på si side kunne verte stilt til ansvar overfor Kyrkjemøtet i samsvar med Reglar for val av Kyrkjerådet § 2.

3. Arbeidsgjevarutvalet har i dag eit mandat som er fastsett av Kyrkjemøtet i sak KM 19/16. Som vedlegg til saksorienteringa, har Kyrkjerådet lagt fram eit framlegg til mandat for arbeidsgjevarutvalet, som Kyrkjerådet kan vedta dersom Kyrkjerådet får mynde til å fastsette slikt mandat. Komiteen ser at framlegget langt på veg vil vidareføre gjeldande mandat for arbeidsgjevarutvalet. Framlegget inneheld endringar frå noverande mandat, og i det følgjande vil vi kommentere nokre av punkta i framlegget til mandat.
4. Komiteen ser det som viktig at heile Kyrkjerådet, og ikkje arbeidsgjevarutvalet, som er eit utval av medlemmer av Kyrkjerådet, skal ivareta overordna arbeidsgjevarpolitiske saker, jf. framlegg til mandat punkta 1 og 2 a). Dette vil styrke den demokratiske legitimiteten til utøvinga av arbeidsgjevaransvaret i rettssubjektet Den norske kyrkja.
5. Når Kyrkjerådet skal fastsetje mandat for arbeidsgjevarutvalet, vil det vere viktig at det vert tydeleg presisert at formålet med arbeidsgjevarutvalet er å utøve det arbeidsgjevaransvaret som er lagt til Kyrkjerådet, innanfor dei overordna føringane som Kyrkjerådet gir, jf. framlegg til mandat punkt 1.
6. Komiteen stiller spørsmål ved om det er nødvendig å avgrense samansetjinga av arbeidsgjevarutvalet ved at mandatet seier at «Arbeidstakarar i Den norske kyrkja kan ikkje veljast som medlemmar av utvalet. Preses er unntatt dette», jf. framlegg til mandat punkt 3. Prestane i Kyrkjerådet representerer embetsstrukturen i kyrkja. Det bør vurderast om habilitetsreglane i forvaltningslova gjev tilstrekkeleg vern mot uheldige interessekonfliktar.

Kyrkjemøtets vedtak

1. Kyrkjemøtet ber Kyrkjerådet om å vedta eit mandat for arbeidsgjevarutvalet.
2. Mandatet for arbeidsgjevarutvalet, fastsett av Kyrkjemøtet 2017, vert oppheva frå det tidspunktet Kyrkjerådet vedtek nytt mandat.

komitéleiar

saksordførar